

Na Juana Morto:

FCCA ta ricibi minister Plasterk na compleho di vivienda

STA. CRUZ -- Diadomingo mainta minister di Asuntonan Interno di Hulanda y alavez den su calidad como Minister di Relacion di Reino, sr. Ronald Plasterk conhuntamente cu minister President Mike Eman, minister Mike de Meza y minister Benny Sevinger y undelegacion a haci bishita na e proyectonan di vivienda di FCCA. E minister nobo aki a cuminsa su bishita di trabao na e parti Caribense di Reino na Aruba. Despues di a atende un sirbishi di misa, e delegacion a yega Juana Morto Complex cu e minister y a wordo ricibi door di e directornan di FCCA, sr. Peter van Poppel y sra. Maria Chirstina Laclé. Sr. Peter van Poppel, director Tecnico y Comercial di FCCA a invita e minister pa reuni cu esnan presente bao di un tent y a tene un discurso chiquito splicando e tarea di e fundacion den e barionan. Minister President tambe a hiba un discurso cortico y a gradici FCCA pa e bon trabao den e bario y

tambe su coleganan minister, specialmente minister Benny Sevinger cu tin e encargo di parti di e infraestructura. Alavez el'a gradici tur instancia cu a haci e renovacion di e bario un exito. Minister Sevinger tabata cortico y tambe a yama danki na FCCA y e otro instancianan pa e bon trabao. Minister Plasterk spontaneamente tambe a dirigi su mes na esnan presenta, indicando cu el'a keda impresiona cu e trabaonan haci den e bario di Juana Morto. E minister a keda introduci na e comision di e bario y a ricibi un splicacion amplio di e meta y e trabaonan di e comision. Habitantenan entusiasta a entregue un regalo y a invita e minister Hulandes pa bishita nan vivienda cual spontaneamente el'a haci tambe. E minister den su bishita cortico na e compleho di vivienda aki di FCCA a probecha di haya hopi informacion y a bandona e compleho pa sigui cu otro actividadnan di su schedule. E minister ya dialuna a bandona nos Pais direccion Corsou.

